



Inatsisartunut ilaasortaq, Nivi Rosing, Inuit Ataqtigiiit
Maani/

Kvotanik pisassiinerni nunap inoqqaavisa akuutinneqartarnerat pillugu § 37 nr. 203 naapertorlugu apeqqummut akissut

10-12-2025
Suliap normua: 2025 - 25349
All. nr. 26021658

Postboks 269
3900 Nuuk
Oq. (+299) 34 50 00
Fax. (+299) 34 63 55
E-mail: apn@nanoq.gl
www.naalakkersuisut.gl

Inatsisartut suleriaasianni § 37-mi imm. 1 naapertorlugu kvotanik pisassiinermi nunap inoqqaavisa akuutinneqartarnerat pillugu Naalakkersuisunut apeqquteqarputit. Apeqqut suliaasaqarfisannit akineqartussanngorlugu innersuunneqarpoq.

Apeqqutigineqartut tulleriinnilersorneqarnerisut akineqartassapput.

1-imut. Naalakkersuisut kvotanik pisassiissarnerup inerisarnisaanut qanoq takorluugarpat?

Akissut:

Piniarnek Aallaaniarnerlu pillugit Inatsisartut inatsisaat kingulleq 2023-imeersoq 2024-milu allannortinneqartoq Naalakkersuisunit malinneqarpoq. Akuersissuteqartarnek aamma akuersissutit §§ 12-15-mi allassimasut naapertorlugit pisassanik tunniussinissamut atatillugu kommunit inuillu inuit nalunaarsorsimaffianni nalunaarsortissimasut akuutinneqarsinnaapput. Nunap inoqqaajuneq nunap inoqqaajunnginnerluunniit aallaavigalugit Kalaallit Nunaani immikkoortitsisoqarneq ajorpoq. Inuit inuit nalunaarsorsimaffianni nalunaarsortissimasut tamarmik assigiimmik pineqartarput, uanili maluginiarneqassaaq piniakkanut killilersukkanut akuersissutit pillugit malittarisassaqaarmat ukiuni marlunni najugaqareersimanissamut tunngasumik.

Piniarnek aallaaniarnerlu pillugit inatsit nutarterneqaaqqammerpoq uumasunullu aalajangersimasunut nalunaarutinngortiterneqarlunilu Naalakkersuisut aalajangiussaataq qutugalugit atulersinneqassalluni. Pisassanik agguaassisarnermi maleruagassat piumasaqaatillu ersarissorujussuupput kommunit inuttaasullu akuutinneqartarnissaat aamma eqqarsaatigalugit.

Akuersissutinik pissarsiniartarnek pisassanillu killilersukkanik killilersugaanngitsunillu pisaqarsinnaanissamut akuersissuteqartarnerit kommuninut innuttaasunullu allaffissornikkut ajornannginnerulersinneqarnissaannut periarfissat Naalakkersuisunit nangillugit eqqumaffigineqassapput. Naalakkersuisut taamaaliorniarpot piniarsinnaanissamut akuersissuteqartarnerit aammalu pisat pillugit nalunaaruteqartarnerit soorlu tuttutarisimasanik umimmattarisimasanilluunniit nalunaaruteqartarnerit qarasaasiat aqutugalugit ingerlanneqarnerusalernerisigut. Ukiuni aggersunnitaaq piniakkat killilersukkat eqqarsaatigalugit qarasaasiat atornerarnerulissapputtaaq.

2-imut. Kvotanik pisassiinermi sumiiffinni inuit nunaqavissut qanoq akuutinneqartarpat?

Akissut:

Pisassiisoqarsimatillugu inatsisinilluunniit allannguisoqarsimatillugu tamanut tusarniaasarnissamik piumasagaat Naalakkersuisunit malinneqartarpoq. Inatsisissatut / nalunaarutissatulluunniit siunnersuutit Naalakkersuisunit piareerneqareeraangata siunnersuutit aqutissat nalinginnaasut aqutigalugit innuttaasunut tusarniutigineqartarput, Piniarneq aallaaniarnerlu pillugit Inatsisartut inatsisaanni § 33 naapertorlugu Piniarneq pillugu Siunnersuisoqatigiit ilanngullugit tusarniaaffigineqartarlutik. Piniarneq pillugu Siunnersuisoqatigiinni ilaasortaataqarput Aalisartut Piniartullu Katuuffiat (KNAPK), Tapertaralugu Pinialuttartut Aalisartartullu Kattuuffiat (TPAK) kiisalu kommunit marlussunnik paarlakaattarlutik ilaasortaataqarlutik. Tusarniutigineqartut tamarluinnarmik Naalakkersuisut nittartakkatigit tusarniaaffigisartagaa aqutigalugu tusarniutigineqartarputtaa. Taamaasiornikkut nunatsinni innuttaasut akissuteqarnissaminnut periarfissinneqartarput taamaasillutillu Naalakkersuisut aalajangersagassaannut sunniuteqarsinnaalersarlutik.

3-imut. Nunap inoqqaavi nuna pinngortitarlu pillugit ilisimasaat qanoq akuutinneqartarpat piniagassanik kvotanik pisassiiniarnermi?

Akissut:

Piniarneq aallaaniarnerlu pillugit Inatsisartut inatsisaanni § 2-mi allassimavoq piniagassat isumalluutit pissusissamisoortumik uumasoqassutsimullu illersorneqarsinnaasumik atorluarneqarnissaasa qulakkeerneqarnissaa inatsimmi siunertaasoq. Inatsisartut inatsisaata allaffissorluni aqunneqarnerani biologit siunnersuinerat nalinginnaasooq aamma piniartut atuisullu ilisimasaat pissarsiarineqarsinnaasut naapertorlugit naapertuuttumik ukiullu qanoq ilinera najoqqutaralugu pitsaanerpaamik atorluanaanissaq aallaavigineqartarput. Innuttaasut sukisaarsaarfeqarnikkut kulturikkullu pisariaqartitaasa ilanngullugit isiginiarneqartarnissaat inatsimmi allassimavortaaq. Kattuuffiit attuumassuteqartut kiisalu Piniarneq pillugu Siunnersuisoqatigiit aqutigalugit piniartut atuisullu ilisimasaasa ilanngunneqarnissaat pingaartinneqarportaaq.

Uumassusilerituut piniagassanik misissuinissaannut atatillugu piareersarnerni misissuinernilu sumiiffinni innuttaasut Pinngortitaleriffimmit akuutinneqartarput. Piniartut piniagassat pillugit aammalu piniagassat najukkamik eqqaani sumiiffigisartagaa pillugit Pinngortitaleriffimmit apersorneqartarput piniagassanillu kitsitsisoqassatillugu kitsisinermi peqataanissamut aggersarneqartarlutik. Nalunaarusiaq Naalakkersuisoqarfimmuttaaq saqqummiunneqartarpoq. Tamatuma kingorna ilisimatuussutsikkut nalunaarusiat kommunini ataasiakkaani pisarineqarsinnaasussatut inassuteqaatitallit Naalakkersuisunit isummerfigineqartinnagit innuttaasunut tusarniutigineqartarput.

Kalallit Nunaat nunat akunnerminni, nunap immikkoortuini nunallu tamalaat suliniaqatigiiffiini arlalinni ilaasortaavoq. KNAPK ataatsimiinnerni taamaattuni alaatsinaattutut peqataasarpoq. Nunat Avannarliit Uumasunut Miluumasunut Imarmiunut Suliniaqatigiiffia (NAMMCO)1992-imersoq piniartunik akuutitsillattaartarpoq piniarnermi sakkut periutsillu pillugit ilisimasaannik saqqummiisittarnerisigut. Uumasut miluumasut imarmiut piniartarnerini piniariaatsit sakkullu pillugit nunanit tamalaanit peqataaffigineqartumik suliamut atatillugu NAMMCO-p aqqissugaanik 2025-imi martsimi ataatsimeersuortoqarnerani kingullermik taamatut iliortoqarpoq. Piniartut nunatsinneersut ullumi qangalu piniariaatsit sakkullu assigiinngitsut tigulluarneqartumik assit seqersittakkat atorlugit saqqummiussimmata.

Arferit mikisut angisuullu piniartarnerinut najoqqutassani, kommuninut KNAPK-mullu agguanneqarsimasunik, NAMMCO-p suliaqarnerani piniartut annertuumik

ilanngussaqaqtarsimapputtaaq. Pineqartut una aqqutigalugu pissarsiarineqarsinnaapputtaaq <https://nammco.no/> - soorluttaaq qamutillit arfernullu qaartartut atornissaannut arlalinnik videoliortoqaqtarsimasoq.

Pisuussutit uumassusillit pigisagut piujuartitsinermik aallaaveqartumik piniarneqartarnissaat, atorluaanerup imminullu pilersornerup annertusarneqarnissaa Naalakkersuisut tapersersugaraat. Naalakkersuisut aqutsinissamut pilersaarutinik periusissianillu ilusilersuillutik suliaqartarput, pilersaarutit periusissiallu innuttaasunit akuuffigineqarnerulernissaat ilaatigut siunertaralugu. Taamaasiornikkut nunarput uumasunik piniagassanik sukannernerusumik aqutsisinnaalissaaq, inuussutissanik avataaneersunik isumalluuteqarpallaarunnaassaaq CO2-millu mingutsitsinermik annikillileraluni. Suliniutissat siuliani taaneqartut innuttaasut akuutillugillu suleqataasinnerisigut aatsaat anguneqarsinnaapput.

Inussiarnersumik inuulluaqqusillunga



Peter Borg

Aalisarnermut, Piniarnermut, Nunalerinermut, Imminut Pilersornermut Avatangiisinullu Naalakkersuisoq